

## ■ COLUMNA

# Esk'et Rodeo, British Columbia, Canada


DA GION CAVIEZEL

**J**eu hai giu ina crisa fundamentala, hai visau mia piazza, priu mes raps, schau crescher ina barba e fatg in viadi grond. Naven, mo naven da tut. Viagiar pil mund entuorn cun la speranza da survegnir ina risposta sin la damonda: Tgei ei la muntada da mia veta?

**I**n gi hai jeu anflau memez a Canada entamiez ils indians, pardon: «First Nation people». Jeu erel segir ch'jeu anflel la risposta denter quels nums exotics sco Shuswap, Chilcotin, Okanagan, Algonkin, Tsilhqot'in ni Athabasken. Aschia hai jeu visitau il Esk'et Rodeo at Alkali Lake. Nowhere land!

**M**o ina via da chis menava en direcziun dil horizont. Ei era plitost ina senda, grad lad avunda da vegnir atras cun in auto, segir duas uras cun tempo trenta. Ed alla fin hai jeu giu il sentiment ch'jeu seigi tut persuls sin quella via. Aschia hai jeu teniu eri e semplamein spitgau. Quei hai jeu schon empriu sin mes viadis: Mintgaton vegn ins vinavon meglier cun tener eri.

**S**uenter in'ura ni duas ei vegniu in grond auto american cun in annex da cavals. Jeu sun sigliaus en miu auto ed hai laguttu puorla tochen ch'in trutg ha menau en in uaul. Tut-



tenina in bi englar egl uaul: ina arena naturala. Jeu hai viu cavals, vaccas, umens e dunnas cun capis da cowboy, in pèr han smenau in lasso. Sin tribuna vev'ei buca bia glied; jeu erel segir il sulet jester. In gruppa giuvnas seseva sper mei. En lur fatschas hai jeu viu la medema passiuon selvadia che las skiunzas avon ina cursa vevan tier nus.

**J**eu hai mirau entuorn. Cheu duess jeu anflar respostas? Jeu hai schon studegiu dad ir anavos, cheu hai jeu viu ina tenda indiana.

**A**von la tenda seseva ina femna veglia: la pial rubigliada sco la meila sin pegna da mia tatta, cavels alvs fatgs en terscholas ed en in maun ina cigaretta.

**J**eu hai vuliu dumandar sch'ella s'audi tier ils Indians e sch'ella savess raquintar zatgei sur la veta sco «First Nation people». Mo ella era pli sperta:

«What are you doing here?»  
Ina vusch sc'in tgierv.

**J**eu hai empruau dad explicar ch'jeu seigi sin viadi. Sin la tscherca da miu destin. Enquerel ina passiuon. Pli probabel ha ella buca capiu bia da mia balbegiada. E dapli ch'jeu tschintschavel, dapli ha ella ris e la finfinala entschiet da tuoscher.

**M**oscha, moscha, moscha! Sas ti ir cun cavagl?» Jeu hai scurlau il tgau. «Ni sesentas cheu da casa?» Puspei hai jeu stuiu gir na.

**E**lla ha tratg vid la cigaretta, il fem ha ferdau suenter jarvas nunenconschentas. Has viu ina dunna?» Ed ella ha dau risadas.» Na, naturalmein buca!» Daco vegns ti lura tier mei?» Ella ha getg quei hofli, hofli, buca ch'jeu seigi permalaus.

**M**ira, jeu sai gidar mia glied. Mia biadia participescha cheu el rodeo e less gudignar. Ella sai jeu gidar. Mo daco manegias ch'jeu sappi gidar tei?»

**E**d en quei mument ei mia tatta vegnida endamen a mi, gie quella Indiana veglia semegliava fetg ella: ils eglis sabis, la fatscha rodonda. L'auter gi erel jeu egl aviun sin via a casa.